

3 osnovne organizacije udruženog rada:

1. Gradjevinsku tehničku školu
2. Geodetsku tehničku školu
3. Školu za kvalifikovane radnike gradjevinske struke.

Ovakva organizaciona šema omogućila je svakoj školi da sačuva izvjesnu unutrašnju samostalnost i operativnost a da s druge strane koristi prednosti velikoga školskog centra: zajedničke kabinete, zajedničku administraciju, itd.

Mi se nadamo da će ova integracija doprinijeti daljem razvoju i unapređenju nastave u Geodetskoj školi na čemu je naša struka posebno zainteresovana sa željom da ova škola zadrži i dalje onu reputaciju koju je stekla svojim dosadašnjim radom.

#### NOVE KNJIGE

K.

Aleksandar Živković - Viša geodezija, I dio.  
Izdavačko preduzeće: Gradjevinska knjiga, Beograd 1972. Cijena 51 din. Knjigu smo vidjeli u izlogu knjižare "Veselin Masleša" u Sarajevu.

---

Tomo Begenišić - Viša matematika I i II dio, II izdanje.  
Izdavačko preduzeće: Zavod za izdavanje udžbenika SRBIH 1972. godine. Cijena 120 dinara. Knjigu možete poručiti od Zavoda za izdavanje udžbenika odnosno knjižara kojima Zavod šalje.

---

#### IN MEMORIAM

PROF. DR ING. FETHULAH SMALBEGOVIĆ

Iznenadna smrt Prof. Fethulaha Smalbegovića odjeknula je bolno medju svim njegovim kolegama, saradnicima i poznanicima.

Umro je 1. a sahranjen 3. maja 1972. godine na Novom groblju u Sarajevu. Ovaj neumorni pregalac umro je na praznik rada, iako za odmor nije znao, a čitav njegov život ispunjavao je samo rad.

Prof. Fethulah Smalbegović rođen je 25.2.1908. godine u Rogatici. Osnovnu školu je pohađao u Tešnju, a gimnaziju u Derventi i Sarajevu. Geodetsku tehničku školu je završio 1928. godine u Beogradu.



Po završetku Geodetske tehničke škole radio je na raznim poslovima premjera Srbije. Posebno su zapaženi njegovi radovi na

triangulaciji 3. i 4. reda grada Niša, Niške Banje, Arandjelovca i Lazarevca, te na radilištima u srezovima Valjevo, Kosjerić i Prokuplje i na povezivanju triangulacije Jugoslavije i Rumunije.

Godine 1936. prelazi u Tuzlu na održavanje katastarskog premjera, a 1937. godine u Tešanj za šefa Uprave za katastar, na kojoj dužnosti ostaje do 1943. godine. Zbog svog antifašističkog djelovanja penzionisan je januara 1943. godine od strane kvislinških vlasti. Drugom polovinom 1943. godine pristupio je NOP-u, a 1. oktobra 1944. godine prelazi na dužnostpredsjednika opštinskog i sreskog NOO u Tešnju.

Prof. Fethulah Smalbegović je najveći dio poslijeratnih godina proveo u Tuzli, gdje je njegova kao stručna tako i društveno-politička aktivnost bila veoma zapažena.

Godine 1947. dolazi za profesora Rudarskog odsjeka Tehničke škole u Tuzli. Njegova poslovična marljivost, entuzijazam istinskog pregaoca i izraziti smisao i sklonost za nastavno-vaspitni rad brzo su mu stvorili zavidan ugled primjernog radnika i pedagoga. U međjuvremenu postaje šef Rudarskog odsjeka i pod njegovim rukovodstvom školovani su mnogi rudarski stručnjaci koji danas rade po rudnicima širom Bosne i Hercegovine, kao i u mnogim rudnicima širom Jugoslavije. Pored nastavno-vaspitnog rada u Školi obavljao je i mnoge druge odgovorne dužnosti kao što su: predsjednik Savjeta za prosvjetu, predsjednik Savjeta za stambenu izgradnju i komunalne poslove, te član sreskog i okružnog NO i mnoge druge.

Želja za sve većim saznanjem navodi ga da se upiše na Geodetski odsjek Tehničkog fakulteta u Zagrebu. Iako opterećen redovnim dužnostima šefa Rudarskog odsjeka Tehničke škole, te mnogobrojnim društvenim aktivnostima, uspjeva da kao vanredni student, i pored već narušenog zdravlja, diplomira u redovnom roku 1955. godine. Tako je, zahvaljujući svojoj velikoj upornosti, opštoj kulturi i već akumuliranom stručnom znanju, uspješno savladao i taj stepen koji ga je vodio sve dalje u naučne probleme geodezije.

Prof. Fethulah Smalbegović dolazi u Sarajevo 1956. godine za direktora Geodetske tehničke škole, Pod njegovim rukovodstvom Škola doživljava svoj puni uspjeh. Njegove organizacione sposobnosti i nastavno-pedagoško iskustvo dolazi u ovoj Školi do punog izražaja. Okuplja nastavni kadar i nabavlja najsavremeniju opremu, a zatim gonjen svojim istraživačkim čulom uporno radi na podizanju geodetskog školstva u SR Bosni i Hercegovini na viši nivo.

Najveća zasluga za osnivanje Više geodetske škole 1961. godine pripada upravo prof. Fethulahu Smalbegoviću, koji je bio i njen profesor i dugogodišnji direktor. Njegovo područje ra-

da bilo je zaista široko. Za njega se slobodno može reći da je bio sa širokim pogledima i primjernim ne samo stručnim, nego i opštim obrazovanjem. On se ne bavio samo nastavno-vaspitnim već i stručnim i naučnoistraživačkim radom.

Najveća njegova stručna i naučna preokupacija bila je problem slijeganja tla u gradu Tuzli. Kao stručnjak sa istančanim osjećajem za geodetske probleme i čovjek sa izrazitim istraživačkim smislom, nije se mogao pomiriti samo sa posmatranjem tihog umiranja njemu dobro poznate stare tuzlanske varoši. Čvrsto je odlučio da sazna prave razloge i zakonitosti ovog svojevrsnog fenomena. Ovaj problem mu nije dao mira sve dok 1956. godine nije otpočeo sa sistematskim praćenjem slijeganja terena u gradu Tuzli, koji je redovno vršio sve do svoje smrti. Sa koliko je žara prišao ovom teškom i kompleksnom problemu grada Tuzle najbolje potvrđuje njegova doktorska disertacija koju je odbranio upravo iz ove problematike u Beogradu 1960. godine.

Pored odgovornih dužnosti direktora Geodetske tehničke, a zatim i Više geodetske škole, vršio je i niz drugih dužnosti. Bio je predsjednik Udruženja nastavnika stručnih škola SR Bosne i Hercegovine, predsjednik Saveza GIG-a Bosne i Hercegovine, član Komisije za naučno-istraživački rad pri Savjetu za naučni rad Bosne i Hercegovine i pri SNT-a Bosne i Hercegovine i mnoge druge.

Godine 1967. Prof. Fethulah Smailbegović prelazi na Rudarsko-tehnološki fakultet u Tuzlu.

Njegove sposobnosti i primjeren rad ovdje, kao i svugdje tamo gdje je radio ranije, stvaraju mu vanrednu afirmaciju kako među kolegama tako i među studentima, te ga na opšte zadovoljstvo biraju za dekana Fakulteta.

Zbog zapaženog doprinosa na organizaciji i opremanju Fakulteta, te školovanja mladog kadra, kao i na organizaciji i afirmaciji naučno-istraživačkog rada ponovo je izabran za dekana ovog Fakulteta na kojoj dužnosti ga je i smrt zatekla.

Gubitak Prof. Fethulaha Smailbegovića je nenadoknativ ne samo za Rudarsko-tehnološki fakultet nego i za čitavu geodetsku struku, njeno školstvo i nauku. Pred samu smrt svesrdno se zalagao za osnivanje Geodetskog odsjeka u Sarajevu i to je smatrao osnovnom polugom daljeg razvoja geodetske djelatnosti u Bosni i Hercegovini.

Čitav njegov život bio je ispunjen samo radom i obavezama koje je tako savjesno izvršavao i kao takav ostaće među kolegama i saradnicima, a naročito mladima kao svijetao primjer radnika, vaspitača i naučnika.

Bio je skroman, uvijek prijatan sagovornik, ali odlučan u borbi za progres. Volio je ljude i rado im je pomagao. Sa posebnim

zadovoljstvom je pomagao mladjim kolegama, a naročito onim koje je zapazio da vole svoju struku i svoj posao.


Bio je neobično odan svojoj porodici, uzoran i plemenit suprug, nježan i osjećajan otac.

Svojim dugogodišnjim samopregornim radom zadužio je našu zajednicu, svojekolege i saradnike, svoje učenike i studente, zadužio je sve oko sebe, ali nikom nije ostao dužan.

Slava i hvala Prof. Fethulahu Smalbegoviću!

IN MEMORIAM  
NIKOLIĆ JANKO, GEOD.INŽ.

Nikolić Ing.Janko rođen 26.V 1940. na Hreši Opština Centar. Završio je Geodetsku tehničku školu 1961.god. u Sarajevu i stupio u radni odnos kod SO Sokolac gdje je proveo 2 godine. 1963. upisao se redovno na Višu geodetsku školu u Sarajevu gdje je diplomirao 1965.godine. Od 1966.god. radio je kod Skupštine Opštine Centar Sarajevo u upravi za geodetske poslove i katastar.



Od samog početka rada kao ing.geodezije sve je poslove rado primao i sa uspjehom završavao, te je kao takav radnik stekao veliko povjerenje i ugled. U kontaktiranju sa ostalim organima uvijek je pokazivao dobru volju za saradnju pa je kao takav bio cijenjen i voljen od svih radnika organa uprave S.O. Centar.

G L A S N I K

IZDAVAČ: SAVEZ GEODETSKIH INŽENJERA I GEOMETARA SR BiH

Odgovorni urednik: Prof.Ing.Muhamed Šestić

Viša geodetska škola, Sarajevo, Vojvode Putnika 10/III

Finansiranje lista vrši Savez GIG-a SR BiH. Listove šaljemo katastarskim uredima, pojedinim geod.stručnjacima i dr. besplatno.